

Departamento di Agricultura, Cria y Pesca engrandeciendo e ofishi di Cria local

Diferente bestia a yega Aruba


ORANJESTAD - Recientemente Departamento di Agricultura, Cria y Pesca a ricibi un cantidad grandi di bestianan for di exterior destina pa e ofishi di Cria local.

Desde inicio di su maneho Minister di Turismo, Transporte y Labor, Sr. Otmar Oduber a expresa su vision pa cu e Departamento di Agricultura, Cria y Pesca, specialmente riba nivel di cria unda cu a pone enfasis riba su deseonan pa e Departamento por cuminsa cu un criansa di baca rendabel na Aruba.

Despues cu Santa Rosa a evalua intensamente e diferente opcionnan di rasanan di baca destina pa produccion di lechi a yega na e conclusion cu e baca rasa Jersey ta e miho rasa puro pa cumpli cu e tarea aki.

E motibonan principal tabata entre otro cu:

- * E rasa Jersey ta un bestia relativamente chikito compara cu otro rasanan productor di lechi.
- * E ta adapta bon den nos clima.
- * Tin necesidad di menos espacio pa cria e bestianan aki.
- * E rasa aki ta bacanan hopi docil
- * Nan ta facil pa maneha.
- * Tin mester di menos cuminda.
- * Ta converti cuminda eficientemente
- * Bon productor di lamchi.
- * Bon mama.



E rasa Jersey ta un di e rasanan di baca di mas bieu di mundo y ta un rasa hopi special cu rasgonan inusual. E rasa aki ta capaz di adapta na un variedad amplio di clima extremo, (specialmente na clima hopi cayente) y condicionnan geografico.

Rond di mundo e rasa Jersey por wordo haya di Dinamarca pa Australia y Nieuw Zeeland, di Canada pa Sur America y di Sur Africa pa Hapon. E cantidad total di lechi cu e Jersey ta duna ta parce poco compara cu e Holstein sin embargo e porcentahe di but-

terfat ta hopi mas halto cual ta haci e lechi uno di calidad halto cu ta ideal pa traha manteca y keshi. Tambe e lechi ta contene considerablemente mas calcium y proteina.

E ta un rasa cu ta madura hopi lihe cual ta haci comun cu nan por werp cu 2 aña di edad of menos.

E baca tin un averahe di peso di 900 liber y ta produci mas liber di lechi pa cada liber di nan peso di curpa compara cu e otro rasanan.

E toro tin un peso di 1200 - 1800 liber.

E mision di Santa Rosa pa cu e bacanan aki ta pa aki 2.5 aña

nan por werp nan prome bishenan y asina e Departamento por cuminsa monitor nan produccion di lechi.

Mirando e interes grandi for di Criadonan di porco pa cu beernan di rasa puro, unda cu Criadonan local kier produci nan mes un crianan, Santa Rosa a busca 4 zeug di rasa puro esta e Duroc y e Hampshire cual ya Santa Rosa tin e padrotnan caba.

E padrotnan aki ta ser uza pa crusa cu e diferente rasanan manera e Landras y Yorkshire pa produci porconan cu ta crece rapido debi cu nan

genetico ta converti nan cuminda rapidamente den carni.

Cu e porco di rasanan puro aki Santa Rosa ta brinda e Criadonan local e oportunidad di sigui cu nan crusamento y tambe upgrade nan zeugnan. Pa por cumpli cu e demanda di bestianan chikito Santa Rosa a trece cabrito y carnenan di rasa White Dorper, Boer y tambe Anglo Nubian. E cabrito rasa French Alpine cu ta un bestia pa produccion di lechi ta wordo reintroduci cu e meta pa amplia e grupo di bestianan cu ta wordo chika.

E French Alpine ta un bestia di estatura mediano, horeanan para, cu un produccion di lechi ta wordo considera superior pa hopi profesional den e mundo di cria. Debi na su tamaño e bestia aki por wordo cria tanto pa produccion di carni como di lechi.

Desde aña 2010 Santa Rosa a importa un total di 112 bestia di rasa den e forma aki aportando na e crecemento di e criansa como produccion di lechi y carni riba nos isla. □

